

永壽縣新志卷十目

補遺

天象

地輿

古蹟

建置

風俗

土產

賦役

祀典

職官

選舉

人物

藝文

別錄

永壽縣新志卷十

知縣蔣基重修

補遺類

天象 賦役

地輿 祀典

古蹟 職官

建置 選舉

風俗 人物

土產 藝文

別錄

天象

分野

〔舊志〕秦爲東井之分永壽距省二百二十里

謂舊永壽

東井

正其分野星也

按玉堂筆記云天之有度猶地之有里每度廣千里度之最多者無如東井至三十有四然則區區永壽當入東井第幾度耶据唐書天文志太宗十七年巳

永壽縣新志卷十

一

卯朔日有食之在東井十六度京師分也今新縣治在長安西北二百五十里以每度千里之說計之亦當入第十六度矣

徵應

〔魏書高允傳〕謂崔浩曰漢元年十月五星聚東井据星

傳太白辰星常附日而行十月日在尾箕昏沒於申南而東井方出於寅北二星何得背日而行此乃歷術之淺事而史官欲神其說不復推之於理浩曰果如君言

五星乃以前三月聚東井

謂十月前三月

非十月也

按秦以建亥月爲歲首五星之聚東井乃秦之十月實卽夏之七月耳顏籀劉攽皆云太初正律以後如

高帝紀春正月之類紀事者以夏時追改其月名獨此一事失於追改故猶書七月爲十月也觀此卽知高允之論金水二星卽太白辰星甚當而謂史官欲神其說則亦未然蓋周將代殷五星聚房齊桓將霸五星聚箕漢業將成五星聚井天道恒象焉可誣哉後東晉時熒惑復出東井而苻秦以亡此休咎二徵之最著者故附論於此

地輿

沿革

關輔統志永壽縣宋時又名長壽縣太平寰宇記云乾德中割長壽入乾州

陝西圖經永壽漢漆縣地甘肅漢涼州地獻帝興平元年分安定扶風爲新平郡領漆鶉觚二縣隸涼州刺史然則永壽曾爲甘肅屬縣矣

按此說本於劉昭注郡國志魏收以新平郡爲建安中置誤也

關內周諮錄太平寰宇記云後魏大統十四年分涇州之新平縣置南豳州以北別有豳此爲南廢帝三年廢北豳州此遂去南字按樂史所謂北別有豳者卽今邠州南豳州卽今永壽縣地杜氏通典於永壽下注云有南豳城魏末置在縣北

陝西資政錄唐永壽縣隸邠州自天祐元年楊崇本以

邠州附於岐至梁末帝貞明初邠州李保衡叛岐來附首尾五六年中永壽當爲岐有

按冊府元龜云後梁貞明元年春三月岐邠州留後李保衡來降保衡楊崇本養子崇本又李茂貞養子賜姓名曰李繼徽任邠州二十餘年後爲其子彥魯所毒保衡殺彥魯送款於帝卽以保衡爲華州節度使而以霍彥威代鎮邠州岐遣劉知俊攻之踰年不克岐兵引還邠土始爲梁有

疆域

關內周諮錄漢縣廣大一縣足當後世一郡且疆界既定不甚改移逮永嘉東渡海宇瓜分南北兩朝互相誇

大徃徃地無百里數縣並建廢置離合不可勝紀姑以永壽一縣論之於北朝爲好時爲漢西爲上宜爲白土爲廣壽縣名寢多疆里轉狹求所謂從某至某廣袤若干者皆莫得而詳也昔賢謂地理之學難於天文職是故耳

按周諮錄謂漢縣當後世一郡其說誠然如舊志以永壽爲漢漆縣今合諸家記注考之則唐之新平普潤邠州亦皆漢漆縣之地一縣如是他可類推矣若後魏之白土縣卽今邠州非永壽也上宜隋縣亦非後魏所置

山水

〔五經攷辨〕梁山有二詩韓奕鄭箋云梁山於韓國之山最高大爲國之鎮所望祀焉在馮翊夏陽西北此指韓城郃陽兩縣界之梁山也書禹貢鄭注云岐山在右扶風美陽西北梁山西南此指乾州永壽兩界之梁山也康成箋注原自畫然孔氏綿詩疏不達鄭意乃合而爲一云梁山橫長其東當夏陽西北其西當岐山東北自幽適岐當踰之殊不知岐周韓國東西相距五六百里古公率西水濟至于岐下豈有走馬徂東之理乎長安志亦云卽禹貢治梁及岐古公所踰秦皇所幸之山其誤正與孔氏同耳

〔四書釋地〕雍有二梁山今韓城縣境書治梁及岐詩奕

奕梁山春秋梁山崩爾雅梁山晉望也皆是與孟子之梁山無涉孟子梁山則在今乾州西北其山橫而長自邠抵岐二百五十餘里山適界乎一百三十里之間太王當日必踰此山然後可免狄患後秦始皇幸梁山亦此山也

按太王所踰之梁山在今麟遊縣非乾州之梁山也在乾州者廣僅二里橫長之說殊不足信已有辨正見藝文類中

〔明一統志〕峽山在永壽縣西南九十里其山巍然故名陝西資政錄自司馬遷作周本紀云去邠渡漆沮踰梁山後人遂以詩之水滸爲漆水文鳳翔駁之云永壽爲

漢唐漆縣求其漆水而弗得近始詢得於九巉之陰細甚又不當率西之道蓋詩止言西澣不言漆奈何強而附之間嘗身至其地知所謂水澣者卽底窖大峪諸水耳案大峪河在永壽縣北發源分水嶺東北流入邠州界謂直父當年率此以西理亦近似然程大昌雍錄云渭水實在梁山之南循渭西上可以達岐則詩水字又似指渭河而非大峪矣

說文論正許氏引爾雅西至于汎國謂之四極从水八聲汎爾雅原本作邠許氏讀汎若邠古人韻緩故耳魏書地形志云太和十一年置班州尋改邠州又改幽州八字平聲爲班班與邠幽俱唇音知汎水卽幽水也金

史地理志云新平縣又有潘水潘與汎音亦近疑祇一水耳

按班乃邠之轉音於義實無所取元魏改班爲邠是已又改邠爲幽者史記索隱云幽卽邠也古今字異耳若唐人改幽爲邠徒以字形近幽亦無別義

明一統志涇水自新平縣流入永壽界

水利

幕府燕談永壽山縣鑿井數十丈尙不及泉爲之者至難或泉不佳則費已重矣後見一術者云凡開井必用數大盆貯水置數處俟夜氣明朗於盆內觀所照者星光何處最大而明則地中必有甘泉也試之屢驗

古蹟

宮殿

關中名勝集史記云秦倚曲臺之宮垂衡天下應劭注秦皇所居不言臺在何地畿輔統志云在永壽縣留村按秦本紀云始皇令咸陽之旁二百里內置官觀二百七十漢書云秦起咸陽西至雍離宮三百雍錄云渭北有苑百八十里西向而入扶風周廻五百餘里則縣境所有當不獨梁山一宮也然臺名僅存蕩無遺址統志之說然乎否乎

郊垆

子史正訛路史國名紀云漆夏世侯伯之國防風氏漆姓之後今永壽縣是其遺墟也然世本無漆姓防風氏姓黎

永壽縣新志卷十

六

說文論正漢書地理志云美陽中水鄉太王所邑言太王遷邑於此也說文解邠字云邠太王國在右扶風美陽與漢書合幽字解云幽美陽亭有幽山从山从豸案幽亭當在今永壽之北邠州之南故杜預云幽在新平漆縣東北括地志云幽在新平縣本漢漆縣史記集解引徐廣云新平縣東北有幽亭帝王世紀云漆有幽亭則書傳所稱實不在美陽也美陽今武功縣在邠州西南相去甚遠許氏蓋因太王作邑於此而誤嘗云邠公劉國在右扶風漆句至太王邑於美陽句幽句漆亭即

邠也則得之矣

故城

陝西資政錄後魏太平真君中置扶風郡治好時今永壽縣好時里扶風廢城是或疑爲漢時郡治非也漢三輔共治長安中右扶風解在夕陽街北見三輔黃圖晉始遷於文學城在始平縣東秦章邯築見長安志皆不在永壽也又有武都城亦當在好時之境今不可考矣按明一統志云右扶風故城在永壽縣東南四十里不去右字亦誤

元和郡縣志漢好時故城貞觀八年廢

第宅

雍大記國朝封建親藩自秦晉諸大國外別有列郡諸王皆食采而不履其地秦王府在西安府之左永壽王府在秦府西南二里有勅建讀書樓此外尙有郡王府七並在秦府左右相去不過二三里

陵墓

昭陵附輦圖考陪葬宰相凡一十三長孫無忌與焉陪葬三品丞郎五十有三無忌之族長孫敞與焉從無徙葬永壽之說

關內周諮錄永壽懷簡王墓在鴻固原

按此說見明一統志然鴻固原在西安府城南三十里非永壽地也

坦軒筆錄明劉以平諸生時夢入宮殿有王者命坐對奕又至一所石門有聯云鸚鵡能留千載夢麒麟空卧萬年秋不解所謂既登第遷秩陝西行太僕寺卿將之永壽登梁山上有利關石刻一聯卽夢中所見也

長安志吳妃陵在好時西北七十里明月山下

通志疆域圖安家營舖在監軍鎮東南有唐安金藏墓按安家營縣冊作安家宮似謂幽宮也舊志作安家空據字典當作控卽龕也長安志云奉天縣梁山鄉有控子村西安府志云咸陽有義鄉控最師控二寺

建置

關梁

關中名勝集穆陵關有三一在山東一在湖廣一在陝西宋蘇軾登廣利亭詩云西望穆陵關東望瑯琊臺此山東臨朐縣之穆陵關也唐劉存過穆陵關詩云南遊匣長劍日暮湘楚間歇馬上秋草逢人問故關此湖廣麻城縣之穆陵關也唐許棠詠穆陵關詩云荒關無吏守亦耻白衣過地廣人耕絕天寒雁下多全首已載藝文類此陝西永壽縣之穆陵關也在永壽者本後魏之莫營關音轉字訛至唐遂呼爲穆陵或以爲宋時始置非也如果宋置唐人安得而豫詠之乎此關乃南幽扼險之處惜頽廢不能復故耳

鎮堡

關內周諮錄永壽惟監軍鎮爲盛初不知監軍何時人
或云唐時邠寧監軍或云宋時涇原監軍或又謂明季
中人爲陝西諸大帥監軍遂家於此臆說紛紛都無確
據近始訪得於土人云明崇禎時邑人任姓者爲河南
監軍道協勦流寇戰沒於朱陽此其故莊因以名鎮耳
考諸永壽人物志果有任公名棟官爵事實悉與土人
言合但不著里居耳錄此以補舊志之闕

〔金史地理志〕永壽舊有邵寨鎮後割隸涇州

元光二年涇州徙治

長武

郵遞

〔皇華載筆〕永壽有麻亭驛考長安志云奉天驛在縣南
三百步北至永壽麻亭驛八十里不知何時改爲永安
也

風俗

性習

幕府燕談周以農事開國公劉修后稷之業於農事尤
兢兢焉以七月之詩考之一歲之中無一日不勞乎農
也一家之中無一人不力乎農也蓋農者衣食之本惟
其關生民之大命是以服天下之至勞迄今南豳民俗
惟以農爲本務雖有野處之秀初不以讀而廢耕以斯
知先王遺澤之入人者至深且遠也然婦無公事而求
桑載績之風寂如此則大異於古所云矣

歲時

〔詩總聞〕幽風凡言月者皆夏正言日者皆周正此於十月之下卽云穹窒薰鼠曰爲改歲是明言公劉當夏時已自以十一月爲歲首不待注疏而本文已自顯然

〔博湖掌錄〕公劉當夏后之世而一之日二之日已用建子爲紀

按朱子云一之日謂斗建子一陽之月二之日謂斗建丑二陽之月蓋周之先公已用此以紀候故武有天下遂爲一代之正朔劉氏亦云幽公創國偏方亦有十月改歲之俗此三正通用之明證也

〔得樹軒哀談〕邠州永壽民多住窰房卽所謂陶穴也蓋

田地有橫土有立土立土不可穴居又不宜種植橫土反是物土之宜而布其利故民習而安焉由周而來未之或革

土產

穀屬

〔皇華載筆〕永壽多寒少燠五穀之收穫獨遲又乏水田故種稻尤尠

貨屬

〔天工開物〕石炭有三種一曰明煤二曰碎煤三曰末煤明煤大者如斗邠州永壽有之

禽屬

詩疏輯要幽風七月鳴鵙毛鄭皆謂幽土晚寒故鳴遲
王肅云蝸及鳴皆以五月鳴今云七月其義不合古五
字如七葢傳寫之譌耳

按孫毓云毛傳言晚寒者幽土寒多雖晚猶寒非謂
寒來晚今永壽蟲鳥之鳴皆後於他縣正寒多之驗
矣然則伯勞鳴於七月理亦有之

皇華載筆永壽多紅嘴雅

賦役

屯衛

關內周諮錄世祖至元中陝西屯田永壽有南北二屯
按長安志至元二十八年陝西屯田四十有八所謂

永壽縣新志卷十

七

南永壽屯北永壽屯者乃渭南一十七屯之二非指
永壽縣也周諮錄誤

祀典

崇祠

斯友堂日記關廟永壽民間皆稱老爺廟亦稱關帝廟
或謂當稱漢壽亭侯廟嘗考元天歷中侯已加封義勇
武安王矣尋又加顯靈威勇之號前明萬歷中加封翊
天大帝建廟於都城外之盆兒衚衕以霜降致祭然則
稱關帝則可老爺之稱似太俚俗

按金章宗承安中有白門趙氏修老爺廟石刻今在
郿縣關帝之稱老爺實始於此又按春明夢餘錄漢

壽亭侯廟在宛平縣東成化十三年建俗呼白馬廟
昔慕容氏都燕羅城有白馬前導因以爲祠蓋
隋舊基又廟碑載明英宗夢見帝乘白馬故名五月
十三日遣太常寺官致祭据此則關廟之祭既不始
於神宗亦未嘗用霜降日也又按陝西通志成陽縣
治北有關帝廟宋開寶六年建亦誤也宋初關聖尙
未封王安得稱帝或本漢壽亭侯廟而後人改稱之
耳

羣祭

列異傳梁山有秦始皇廟至今有祭者往往有一二百
蝴蝶降祠所享其食近之不驚徹饌然後羣去時謂秦
皇侍從捉之者病

陝西資政錄永壽名宦首呂大防其先已入西安府學
七賢祠七賢者張載呂大忠大鈞大臨范育蘇昞暨大
防而七也

職官

知縣

陝西資政錄永壽知縣張焜仁明廉介遇事力行建城
池創學宮通水利申荒糧革里差疏鹽引皆毅然捐俸
爲之時論以爲不愧名宦云

按張令修志後故冊漸遺官司失次茲詳加蒐錄並
因公事入廟見有記文聯額題名某某者自知縣以
下復得二十餘人然姓氏僅列里居半湮矣

祝鍾傑襄平人康熙二十八年六月立城隍廟巖城保障扁額尋陞奉天寧遠州知州 萬廷詔康熙三十年立觀音廟慈航普渡扁額 盧化敬閩縣人康熙四十年三年撰重修城隍廟記載藝文類立日監在茲扁額 王帝簡三韓人康熙四十六年立關帝廟莫不尊親扁額五十年撰重修城隍廟記 梁須棟安定人雍正二年重修觀音廟屋梁 周文彞雍正五年撰城隍廟對聯 王容乾隆五年立城隍廟金湯永固扁額 王薰滄州人在任年月無考有觀音廟板對一聯 黃中銓 黃義 潘偉見卷一三

典史

汪澤環縣人與李令如瑾同時 劉陞與盧令化敬同

時 李進美康熙四十三年至四十六年以蒿店所大使代理尉事 胡承元與王令帝簡同時 戴天授與王令容同時

訓導

王永祚三原人與盧令化敬王令帝簡同時 劉澤宏與王令帝簡同時 王學與周令文彞同時 胡煌與王令容同時

把總

劉玉祥與盧令化敬同時 賀禎祥與周令文彞同時 按縣境舊有蒿店底窖二所蒿店所大使李進美魏宏見寺廟題名時康熙四十六年暨五十三年也然

則裁缺當在雍正之初歟

縣丞

關內周諮錄永壽在唐爲大縣故令丞簿尉並設明制縣丞主簿添革不一若編戶不及二十里者皆裁革今考永壽無主簿而縣丞至天啟中始裁豈天啟以前編戶尙滿二十里耶又有巡檢使副使遞運所大使副使後汰副使惟巡檢及遞運大使至

國朝並除

按明一統志永壽縣編戶一十里志係天順五年吏部尙書李賢等纂則天啟以前實亦不滿二十里也又按元和郡縣志貞觀四年於永壽縣置醴泉監兼置屯五所隸太常寺不知何時廢云

永壽縣新志卷十

七

張志職官自令以下缺而弗備禩遠無徵明天順初年至聖廟碑中載有縣丞新城馬騏例當續入恐先後失倫今姑與拈出則志之遺漏可知矣

選舉

進士

西安府志進士始於隋而盛於唐迄今稱甲榜焉惟北宋宣和三年罷進士立三舍之法今之館學生廼進士之屬也令長佐雜以次擢用

按舊志歷朝以來邑人多由貢舉徵薦出身獨未就館學一途亦闕事也誰爲補之是不能無望於後之

有志觀光者

人物

寓賢

〔西京雜記〕漢婁敬始因虞將軍請見高祖衣旃衣披羊裘虞將軍脫其身上衣服以衣之敬曰敬本衣帛則衣帛見敬本衣旃則衣旃見今舍旃褐假鮮華是矯常也不敢脫羊裘而衣旃衣以見高祖 〔又〕陸賈屏居好時日樊將軍過之嘗問自古人君皆云受命於天云有瑞應豈有是乎賈應之曰有之夫目矐得酒食燈火花花得錢財乾鵲噪而行人至蜘蛛集而百事喜小既有徵大亦宜然故目矐則呪之火花則拜之乾鵲噪則餞之蜘蛛集則放之況天下大寶人君重位非天命何以得之哉瑞者寶也信也天以寶爲信應人之德故曰瑞應無天命無寶信不可以力取也

仙釋

〔明碑〕倡法師居雲寂寺碧峰之師也

〔皇華載筆高僧記〕永壽武陵山寺有明太祖賜石碧峰禪師袈裟一襲上多題詠考明史李仕魯傳云帝踐祚後頗好釋氏詔徵戒德僧數建法會於蔣山應對稱旨者輒賜金襴袈裟碧峰其首選也

按袈裟今尙存寺僧秘之洵五百年來淨居法寶矣 〔廣異記悟元傳〕元延祐中陝西永壽縣一村嫗住常寧

莊有道士自號悟元子從石牛山來日就嫗乞食嫗卽與之無吝色道士曰嫗二十年後當有災今以鐵簡投汝至時急投諸火言訖而去久之嫗之女長而美一日有稱大王者騎從甚都借宿嫗家遣左右謂曰聞得異人鐵簡可出示否嫗平日數爲他人借觀因造一僞物而以真者懸腰間遂用僞獻留不還曰汝可呼汝女行酒以疾辭大王怒便欲爲奸嫗思道士之言計歲數又合乃解鐵簡投鑪火內旣而電掣雷轟擊死獼猴數十其一甚巨蓋其王也悟元子或卽張守貞云

藝文

論

明顧祖禹乾州形勢論控長安之近郊當鳳翔之孔道唐德宗保奉天卒卻朱泚之逼蓋北有永壽通涇邠之甲騎南有武功集梁洋之轉輸守奉天而賊之精銳不能越京師數百里間矣用兵所以貴於勢險而節短也

詩

張明廷新建虎頭城終夜防寇云城似虎頭山似盤盤山踞虎創雄觀中峰古塔層層起兩澗清泉曲曲湍月到天心渾不夜風來谷口頓生寒三秦寇盜今如此未許將軍卽解鞍又臨別云一署憐焦土殘黎泣廢疲人稀炊減竈井舊汲無錡露冷林花瘦山空鳥腹飢安懷曾幾日送別各凄其

按右二詩見南堡門內關帝廟牆碑題云晉偏關張明廷不知何許人也詳味詩意似康熙中張令焜未任以前有令於此邑者爲之然年月官銜俱無可徵姑錄其詩以俟再考

別錄

述異

〔晉書苻堅載記〕太元七年新平郡獻玉器於秦初太史令王雕上疏曰新平地應出帝王寶器其名曰延壽鼎願陛下誌之平七州之後出於壬午之年至是新平人果得之以獻器銘篆書文題之法一爲天王二爲王后三爲王公四爲諸侯五爲伯子男六爲卿大夫七爲元士自此以下考載文記列帝王名臣自天子王后內外次序上應天文象紫宮布列玉牒版詞不違帝王之數從上元人皇起至中元窮於下元天地一變盡三元而止堅以其言有徵追贈光祿大夫

〔鴻書〕唐肅宗爲皇太子元宗幸蜀留上在後宣諭百姓賊兵追近上自奉天而北夕次永壽百姓遮道獻牛酒有白雲起西北長數丈如樓閣之狀議者以爲天子之氣自是紫雲擁帝所乘馬聚散不時

〔宣室志〕扶風竇寬家於梁山下唐太和八年罷職歸治園屋命家僕伐一樹有血滂溜汪然注地食頃而盡寬知爲怪閉門絕人事至明年鄭注李訓反寬與注連遂

死於左禁軍中

〔舊志〕明嘉靖三十九年永壽城西武亭河岸穴中出白霧俄然結成人馬形有乘馬者有步行者宛然如生皆雄傑可畏至盤道山北散爲有翼螻蟻

紀兵

〔後漢紀〕光武西征至漆議者以爲車駕不宜入險且遣諸將觀虛實馬援獨勸上進兵車駕遂發

〔劇談錄〕唐黃巢陷長安鄭相國鎮岐下密飛檄告於隣道旬朔間涇邠諸鎮俱以銳師從奉天好時南來

〔資治通鑑〕唐昭宗天祐元年九月朱全忠引兵北屯永壽

〔金史婁室傳〕天會中攻乾州始築甬道列礮具而州降遂北取邠州

